

REGLUGERÐ

um tilvísanir.

1. gr.

Í samræmi við markmið um fagleg samskipti milli heilsugæslulækna, heimilislækna og sérfræðinga miðar reglugerð þessi við að samskipti sjúklings og læknis hefjist hjá heilsugæslulækni eða heimilislækni.

2. gr.

Skilyrði þess að sjúkratryggingar Tryggingastofnunar ríkisins greiði fyrir sérfræðilæknisþjónustu og rannsóknir er að sjúklingur afhendi sérfræðingi tilvísun eða beiðni og að hlutaðeigandi sérfræðingur starfi samkvæmt samningi við Tryggingastofnun ríkisins.

Með *tilvísun* er átt við eyðublað sem eingöngu heilsugæslulæknar og heimilislæknar gefa út og afhenda sjúklingi vegna meðferðar hjá sérfræðingi í læknisfræði.

Með *beiðni* er átt við blað sem heilsugæslulæknar, heimilislæknar eða sérfræðingar gefa út vegna rannsókna hjá röntgendeild eða -stofu eða rannsóknardeild eða -stofu.

3. gr.

Tilvísun samkvæmt 2. gr. geta eingöngu heilsugæslulæknar og heimilislæknar fyllt út og afhent sjúklingi, sbr. þó 9. gr.

Rísi ágreiningur milli heilsugæslulæknis eða heimilislæknis og sjúklings um þörf á tilvísun getur sjúklingur snúið sér til landlæknis sbr. 5. málsg. 3. gr. laga um heilbrigðisþjónustu nr. 97/1990 með síðari breytingum.

4. gr.

Tilvísun skal vera í þríriti og með þeirri áletrun sem fram kemur í fylgiskjali með reglugerð þessari.

Tilvísanaeyðublöð skulu númeruð. Sá aðili sem Tryggingastofnun ríkisins felur að útbúa tilvísanaeyðublöð skal halda skrá yfir númer tilvísanaeyðublaða sem hver heilsugæslustöð og heimilislæknir fær. Tryggingastofnun ríkisins getur hvenær sem er óskað upplýsinga hjá þeim sem útbýr tilvísanaeyðublöðin um viðtakendur tiltekinna númera tilvísanaeyðublaða.

Á tilvísanaeyðublað skal prenta nafn þeirrar heilsugæslustöðvar sem heilsugæslulæknir sá sem gefur út tilvísun starfar hjá eða áritunina „Sjálfstætt starfandi heimilislæknir“.

Kostnaður við gerð og prentun tilvísanaeyðublaða greiðist af heilsugæslustöð en sjúkratryggingar Tryggingastofnunar ríkisins greiða fyrir tilvísanaeyðublöð sjálfstætt starfandi heimilislækna.

5. gr.

Tilvísunarlæknir heldur eftir einu afriti tilvísunar en afhendir sjúklingi frumrit ásamt afriti.

6. gr.

Tilvísunarlæknir tilgreinir á tilvísun þá grein sérfræðilækninga sem sjúklingi er vísað til. Sjúklingur ákveður til hvaða sérfræðings innan viðkomandi greinar hann leitar.

7. gr.

Tilvísunarlæknir ákveður gildistíma tilvísunar. Gildistími skal þó aldrei vera lengri en átján mánuðir.

Gildistími miðast við dagsetningu tilvísunar.

Tilvísunarlæknir skal sérstaklega kynna fyrir sjúklingi og vekja athygli hans á hvenær gildistíma tilvísunar lýkur.

8. gr.

Sjúklingur afhendir sérfræðingi frumrit tilvísunar ásamt afriti í fyrsta viðtali.

Ef um langtíma meðferð er að ræða skal sérfræðingur með nægum fyrirvara vekja athygli sjúklings á hvenær gildistíma tilvísunar lýkur.

Á reikningi sérfræðings til sjúkratrygginga Tryggingastofnunar ríkisins skal hann tilgreina númer tilvísunar, dagsetningu hennar, gildistíma og nafn tilvísunarlæknis, og heilsugæslustöðvar ef við á.

9. gr.

Nú telur sérfræðingur, sem sjúklingur leitar til samkvæmt tilvísun, nauðsynlegt að annar sérfræðingur skoði sjúkling og er honum þá heimilt að vísa sjúklingi einu sinni áfram til annars sérfræðings.

Í þeim tilvikum tekur sérfræðingur ljósrít af frumriti tilvísunar, áritar á frumritið vísun til annars sérfræðings og afhendir sjúklingi hið áritaða frumrit.

10. gr.

Sérfræðingur sem fær sjúkling til skoðunar fyrir milligöngu annars sérfræðings, sbr. 9. gr., skal á reikningi sínum til sjúkratrygginga Tryggingastofnunar ríkisins tilgreina númer tilvísunar, dagsetningu hennar, gildistíma, nafn tilvísunarlæknis, heilsugæslustöðvar ef við á, og nafn sérfræðings sem vísaði sjúklingi áfram.

11. gr.

Sérfræðingur skal á afriti tilvísunar senda heilsugæslulækni eða heimilislækni upplýsingar um sjúkdómsgreiningu og meðferð sjúklings. Komi sjúklingur til sérfræðings án tilvísunar heilsugæslulæknis eða heimilislæknis skal sérfræðingur senda heilsugæslulækni eða heimilislækni viðkomandi læknaþréf. Komi sjúklingur til sérfræðings vegna milligöngu annars sérfræðings, sem sjúklingnum var vísað til samkvæmt tilvísun, skal síðari sérfræðingurinn senda læknaþréf til heilsugæslulæknis eða heimilislæknis sjúklingsins og þess sérfræðings sem hafði milligöngu um samskiptin.

Sjúklingur getur krafist að sérfræðingur sendi ekki upplýsingar um sig til annarra lækna. Skiptir ekki máli í þessu sambandi hvort sjúklingur hefur komið til sérfræðings samkvæmt tilvísun eða ekki. Ef slík krafa kemur frá sjúklingi er sérfræðingi skylt að útskýra fyrir honum hugsanlegar afleiðingar þess að upplýsingum um rannsóknir og meðferð er ekki miðlað til heilsugæslulæknis eða heimilislæknis og ábyrgð sjúklingsins í því sambandi. Jafnframt skal hann geta þessa í sjúkraskrá sinni um sjúklinginn.

12. gr.

Tilvísanir skal gefa út eftir 20. febrúar 1995 vegna heimsóknna til sérfræðinga. Frá og með 1. maí 1995 greiða sjúkratryggingar Tryggingastofnunar eingöngu reikninga frá sérfræðingum sem starfa samkvæmt samningi við stofnunina og sem tilgreina númer tilvísunar, dagsetningu hennar, gildistíma, nafn tilvísunarlæknis, heilsugæslustöðvar ef við á, og nafn sérfræðings sem vísaði sjúklingi áfram, sé um það að ræða.

13. gr.

Nefnd sem ráðherra skipar skal fylgjast með faglegri framkvæmd tilvísanakerfisins. Nefndin skal gefa ráðherra áfangaskýrslu um reynslu af því 1. febrúar 1996 og síðan lokaskýrslu eigi síðar en 1. febrúar 1997. Í framhaldi þeirrar skýrslu skal reglugerð þessi endurskoðuð í ljósi fenginnar reynslu.

14. gr.

Reglugerð þessi sem sett er með stoð í b-lið 1. málsg. 36. gr. laga nr. 117/1993 um almannatryggingar öðlast þegar gildi.

Ákvæði til bráðabirgða

Sérfræðingar sem eru með sjúklinga í langtíma meðferð er reglugerð þessi öðlast gildi skulu með nægum fyrirvara gera sjúklingum sínum grein fyrir þeim breytingum á greiðslureglum sjúkratrygginga sem öðlast gildi 1. maí 1995 og því að tilvísun sé m.a. nauðsynleg fyrir áframhaldandi meðferð eigi sjúkratryggingar að taka þátt í kostnaði. Jafnframt skulu þeir rita heilsugæslulækni eða heimilislækni sjúklings, gera grein fyrir meðferð og gera tillögu um útgáfu tilvísunar óski sjúklingur eftir því.

Heilbrigðis- og tryggingamálaráðuneytið, 9. febrúar 1995.

Sighvatur Björgvinsson.

Páll Sigurðsson.

Útgefandi (heimilislæknir, heilsugæslulæknir)		TILVÍSUN Dagsetning tilvísunar		NR. Gildistími (fjöldi mánaða í bókstófum)	
Sjúklingur (nafn, kennitala, heimili)					
Viðtakandi (sérfræðingur/sérgrein)					
Ástæða tilvísunar ☐ Samráð sjúklings og tilvísunarlæknis ☐ Áð beiðni sjúklings ☐ Framhaldsmeðferð					
Saga					
Skobun					
Mat					
Lyf					
Svar					
Annar sérfræðingur (sem sjúklingi er vísað til)			Tilmæli til sérfræðings		
Stimpill/blokkskrift og undirskrift sérfræðings			Stimpill/blokkskrift og undirskrift útgefanda		
Dags. Undirskrift			Dags. Undirskrift		

Tilvísunareyðublaðið er í þrinni. Frumrit er
eintak sérfræðings, ítemia afrit er fyrir svar
sérfræðings, en afgang afriti heldur útgelendi.